

خَطِ دَوْمِ پوْلُسِ بَلَدِه تيموتائوس

پيشگفتار

امی خطِ دَوْمِ پوْلُسِ که بَلَدِه تيموتائوس نوشته شده، کلونی شی نصیحتای شخصی پوْلُسِ بَلَدِه تيموتائوس آسته، چُون تيموتائوس دَ عِنوانِ همکار و دوستِ جوانِ پوْلُسِ دَ نصیحتای پوْلُسِ ضرورتِ دشت. مَوْضوعِ اصلی امزی خطِ صبر و بُردباری آسته. دَ امزی خطِ پوْلُسِ تيموتائوس ره تشویقِ مونه که باوجودِ سختی ها و مُخالفتِ ها وفادار باقی بُمَنه و دَ باره عیسیٰ مسیحِ دَ شاهی دَدونِ خُو اِدامه بَدیه، دَ تعلیمی که واقعاً از کتابِ مُقَدَّسِ آسته پایبند بَشه و وظيفه خُو ره دَ عِنوانِ اعلانِ کُننده خوشخبری و معلّمِ دَ خُو بی انجام بَدیه. پوْلُسِ تيموتائوس ره سخت خبردار مونه که دَ جر-و-بحثِ های غَیرِ عقلانی و غَیرِ منطقی نَشینه، چُون هیچ فایده نَدره، بلکه باعثِ از بَین رفتونِ شَنونده ها موشه.

پوْلُسِ بَلَدِه بیانِ کدوِنِ پگِ امزی مَوْضوعِ ها طَریقَه زندگی خود خُو ره مثال میدیه و تيموتائوس ره تشویقِ مونه که از طَریقَه زندگی ازو سرمشق بَگیره، چُون ایمان، صبر-و-حوصله و پایداری که پوْلُسِ دشت و رنجِ های ره که اُو تَحْمَلِ مُوکد، پگِ شی میتنست تيموتائوس ره دَ انجامِ دَدونِ خدمتِ شی تشویقِ کُنه.

فهرستِ عنوانِ ها:

سلامِ ها (فصلِ ۱ آیه ۱)

تشویقِ دَ وفاداری (۱:۳)

مُشَخَّصَاتِ خِدْمَتِگَارِ خُدا (۱۴:۲)

بِے خُدایِ دَ زَمَانِ آخِرِ (۱:۳)

اهمیتِ کلامِ خُدا (۱:۴)

نصیحتِ های شخصیِ پوئس (۹:۴)

سلامِ ها

۱ از طرفِ پوئس که دَ خاست و ارادهِ خُدا و دَ مُطابِقِ وعدهِ زندگیِ اَبَدیِ که دَ مسیحِ عیسیٰ پیدا موشه، رَسولِ مسیحِ عیسیٰ اَسْتُمْ. ۲ تقدیمِ دَ باچهِ عزیزِ مه، تیموتائوس: فیض و رَحمت و سلامتی از طرفِ آتِه مو خُدا و مَولایِ مو مسیحِ عیسیٰ نصیبِ تُو شنه.

تشویقِ دَ وفاداری

۳ شاو و روزِ خُدا ره شکر-و-سپاسِ مَوگَم و دَزُو مِثْلِ بابِه کَلونایِ خُو قد وِجْدانِ پاکِ خِدْمَتِ مَوْنَم و دَ دُعا هایِ خُو هر وخت تُو ره یادِ مَوْنَم. ۴ وختیِ آویدِه تُو ره دَ یادِ خُو میْرَم، ما آرزوِ مَوْنَم که تُو ره بسمِ بِنِگَرَم تا خوشیِ مه کاملِ شنه. ۵ ما ایمانِ بے ریبایِ تُو ره دَ یادِ خُو

میرم که اول د آجه تو لوئیس و بعد ازو د آبه تو آفنیکی وجود دشت. و ما اطمینان درم که امو ایمان دز تو ام وجود دره. ^۶ امزی خاطر د یاد تو میرم که امو نعمت خدا ره که د وخت کشیدون دستای مه د بله تو دز تو دده شد، دوباره شعله ور کنی. ^۷ چون روحی ره که خدا دز مو دده، روح ترس نییه، بلکه یگ روح قدرت، محبت و خودداری آسته. ^۸ پس، از شاهی ددو د باره مولای مو شرم نکو و از رابطه گرفتو قد ازمه که از خاطر شاهی ددو د باره مولا بندی آستم، ام ننگ نکو. بر عکس، د وسیله قدرتی که خدا میدیه قد ازمه د رنجی که از خاطر خوشخبری میکشم، شریک شو. ^۹ خدا مو ره نجات دده و سون یگ زندگی پاک-و مقدس کوی کده. ولے ای از خاطر اعمال از مو نبود، بلکه از خاطر مقصد خود شی و از خاطر فیضی که توسط مسیح عیسی پیش از شروع دنیا دز مو دده شدد.

^{۱۰} و آلی امو فیض د وسیله ظهور نجات دهنده مو عیسی مسیح بر ملا شده. او مرگ ره از مینه باله کد و راه زندگی ابدی و نیست ناشدنی ره د وسیله پیغام خوشخبری معلومدار کد. ^{۱۱} و خدا مره انتخاب کد تا که بلده پخش کدون امزی خوشخبری اعلان کننده، رسول و معلم بشم. ^{۱۲} امزی خاطر پگ امزی رنج ها ره مینگرم، لیکن شرمنده نییم، چرا که ما میدنم که د کی ایمان آوردیم و یقین درم او قدرت دره که امانت مره تا روز آخرت نگاه کنه. ^{۱۳} از تعلیم درست که از مه شنیدی قد ایمان و محبتی که د مسیح عیسی آسته، سرمشق بگیر. ^{۱۴} امو نعمت خوب که دز تو بخشیده شد، او ره د کومک و یاری روح القدس که دز مو وجود دره، نگاه کو.

^{۱۵} تُو ازی خبر دَری که تمامِ برارو دَ ولایتِ آسیا مَره ایله کد، دَ شَمُولِ فِیجِلُس و هِرْموَجِنِس. ^{۱۶} مَولا عِیسی رَحمت خُو ره نَصیبِ خانَوادِه اونِیسیفُورُس کُنه، ازی که اُو بارها دِل مَره تازه کد و از بَندی شُدون مه شَرمنده نَشُد، ^{۱۷} بَلکه دَمزُو غَیْتیکه دَ شارِ رُوم رِسید، اُو دَ کوشِشِ کَلو مَره پالیده پَیدا کد. ^{۱۸} مَولا عِیسی دَزُو لُطف کُنه تاکه اُو دَ روزِ قِیامت دَ حُضُورِ خُداوند رَحمت پَیدا کنه، چُون تُو خُوبتر خبر دَری که اُو دَ شارِ اِفَسُس چی خِدْمَتای کَلو کد.

^۲ پَس آی باچِه مه، تُو دَ فِیضی که دَ مَسیحِ عِیسی اَسْتِه، قَوی بَش. ^۲ و اُمُو تورا ی ره که دَ حُضُورِ شاهِدونِ کَلو از مه شِنیدی، دَ کسای یادِ بدی که قَابِلِ اِعتبار و قَابِلِ دَ تَعْلیم دَدونِ دِیگرو بَشِه.

^۳ مِثِلِ یگِ عِسکرِ خُوبِ مَسیحِ عِیسی دَ سَخْتی ها شَرِیک شُدِه تَحْمَلِ کُو. ^۴ هِیچِ عِسکرِ خود ره دَ کارای عادی زندگی بَنَد نَمُوکُنِه، بَلکه هَدَفِ شی اِیْنِمی اَسْتِه که رِضایَتِ قومندان خُو ره حاصِل کُنِه. ^۵ اَمی رَقم، وختی یگِ وِرزِشکار دَ مُسابقه حِصّه مِیگِیره، اُو نَمِیْتنه تاجِ پِیروزی ره حاصِل کنه، سِوای که از قانُونِ شی پِیروی کنه. ^۶ دِیغو که زَحمت کَشیده، باید اَوّلین کسی بَشِه که حقِ خُو ره از حاصِلاتِ بگِیره. ^۷ دَ بِلِه امزی توره که مُوگَم خُوبِ فِکر کُو، چُون مَولا تُو ره دانایی مِیدیه تاکه هر چیز ره بَقامی. ^۸ عِیسی مَسیحِ ره دَ یادِ خُو بَیرو که از نسلِ داوود بُوَد. اُو پَس از مَرگِ دُوباره زنده شُد که اِیْنِمی

خوشخبری آسته^۹ و از خاطرِ امزی پیغام ما رنج-و-زحمت مینگرُم و حتی رقم یگ جنایتکار
دَ زنجیرِ آستم. مگم کلامِ خُدا دَ زنجیرِ بسته نمُوشه.^{۱۰} پس پگِ امزی چیزا ره از خاطرِ
انتخاب شده های خُدا تَحْمَلِ مُونُم تا که اونا ام صاحبِ نجات شُنه، صاحبِ نجاتی که دَ
مسیح عیسی پیدا موشه قد جلالِ اَبَدی.

^{۱۱} اینمی توره قابلِ اعتماد آسته:

اگه مو قد مسیح مُردی، قد ازو زندگی ام مونی.

^{۱۲} اگه تَحْمَلِ کُنی، قد ازو پادشاهی ام مونی،

اگه او ره انکار کُنی، او ام مو ره انکار مونه،

^{۱۳} ولے اگه مو بے وفا آستی، او وفادار مومنه،

چراکه او نَمیتنه خود خُو ره انکار کُنه.

مُشَخَصَاتِ خِدْمَتِگَارِ خُدا

^{۱۴} ای چیزا ره دَ ایماندارا یادآوری کُو و اونا ره دَ حُضُورِ خُدا اَخْطَارِ بَدی که از بَحْثِ و

جنجال دَ سرِ کلماتِ دُوری کُنه، چراکه ای کار هیچ فایده ندره، بلکه فقط شَنوندا ره تباہ مونه.^{۱۵} سخت کوشش کُو که قابلِ پسندِ خُدا شنی، رقمِ یگِ خدمتگارِ که هیچ دلیلِ بلده شرمندگی ازو وجود ندره و کلامِ حقیقت ره بطورِ دقیق و صحیح تعلیم میدیه.^{۱۶} از گفتوگوی پُوج و بے آرزش دُوری کُو، چراکه مردُم ره کَلوترِ طرفِ بے دینی موبره.^{۱۷} توره ازوا رقمِ مَرَضِ ساری آلی پَخش موشه. هیمینائوس و فیلیطس از جُمله امزُو کسا آسته^{۱۸} که از حقیقت زوی گردو شُده و مَوگه که «گاه قیامت شُده» و دَ ای وسیله ایمانِ بعضی کسا ره از بین موبره.^{۱۹} مگم تادو محکم ره که خُدا ایشته، اُستوار آسته و اینمی کلمه ها دزُو نقش شُده:

“خداوند بنده های خُو ره مینخشه.”

و

“هر کسی که نامِ خداوند ره دَ زبو میره، باید از بدی دست بکشه.”

^{۲۰} دَ یگِ خانه کُنه علاوه از دیگ-و-کاسه طِلابی و نُقرهیی، پیله-و-کاسه چوبی و گلی ام وجود دره. بعضی ازوا بلده مقصدِ خاصِ استفاده موشه و بعضی ازوا دَ ضرورتای روزمره.^{۲۱} پس اگه کسی خود ره امزُو چیزای که گُفتم پاک کُنه، اُو مثلِ ظرفی آسته که بلده مقصدِ خاصِ دَ کار مییه که بلده صاحبِ خُو پاک و فایدهمند و بلده هر کار نیک تیار

^{۲۲} از شهوتای که دَ دَورونِ جوانی آسته دُوتا کُو و قد تمامِ کسای که از دِلِ پاک دَ پیشگاهِ مولا دُعا مونه، دَ دُمبالِ عدالت، ایمان، مُحَبَّت و صَلَح-و-سلامتی بگرَدُو. ^{۲۳} دَ بَحْثِ های پُوچ و جاهلانه کار نگیر، چُون میدنی که ای چیزا آخر شی جنگ-و-جدَل آسته. ^{۲۴} لیکن خدمتگارِ مولا نباید جنگ-و-نزاع کُنه، بلکه باید نَسَبَت دَ پگِ مردُم مهربو، دَ تعلیم دَدُو قابل و دَ برابرِ مردُم بد، بُردبار و با حوصله بشه. ^{۲۵} او باید مُخالِفای خُوره دَ نَرَمیِ اِصلاح کُنه تا شاید خُدا اِجازه بدیه که اونا توبه کُنه و حقیقت ره پی بُبره ^{۲۶} و دَ خود آمده از دام شیطو دُوتا کُنه، چُون اونا بلده پوره کدونِ خاستِ ازو اسپیر بُوده.

بے خدایی دَ زمانِ آخر

^۳ مگم ای ره بدینید که دَ روزای آخر اوقاتِ تلخ آمدنی آسته؛ ^۲ چُون مردُم خود پرست و پُول دوست، لافک و مغرور موشه. اونا تورای زشت و کفرآمیز مَوگیه و از ایدِ آته و آبه خُو نموشه؛ اونا ناشکر، ناپاک، بے مِهَر، سخت دِل، چُغُول، ناپرهیزگار، وَحشی، دُشمنِ نیکی، ^۴ خیانتکار، تَندُخوی و بے پروا و پُر پُف-و-پِئاق موشه و اونا دَ جای ازی که خُدا ره دوست بدنه، عیاشی ره کلوتر دوست میدنه. ^۵ ظاهراً اونا خود ره دیندار نشو میدیه، مگم قدرتِ دینداری ره رد مونه. از او رقمِ مردُم دُوری کُو. ^۶ دَ بَینِ ازوا کسای آسته که دَ چَل-

و-نیرنگ دَ مَنه خانه های مردُم راه پیدا مونه و خاتونوی کم عقل ره که دَ تَی بارِ گناه خَم شُدِه و دَ زیرِ تاثیرِ هوس های رقم رقم رفته، دَ چنگ خُو میره. ^۷ ای رقم خاتونو هر وخت تعلیم نو حاصل مونه، مگم هیچ وخت حقیقت ره دَرَک نَمیتنه. ^۸ امو رقمیکه «یئیس و یمبریس» قد موسی پیغمبر مُخالفت کد، امی نفرای چلبازام مُخالِفِ حقیقت آسته. فِکرای ازوا گنده شُدِه و اونا از نگاه ایمان رد شُدِه. ^۹ مگم اونا کلوتر ازی پیشرفت نمونه، چراکه لودگی ازوا دَ پگ معلومدار موشه، امو رقمیکه حماقتِ یئیس و یمبریس دَ پگ معلوم شُد.

^{۱۰} لیکن تُو از تعلیم، رفتار، هدَف، ایمان، صبر و حوصله، مُحَبَّت و بُردباری از مه سرمشق گرفتی ^{۱۱} و از آزارها و رنج های که دَ شارای انطاکیه، قونیه و لستره دیدم، خبر آستی و میدنی که چی زجرها ره دَ اونجی کشیدم، ولے مولا عیسیٰ مره از پگ شی خلاص کد. ^{۱۲} دَ حقیقت، تمام کسای که میخایه دَ راه مسیح عیسیٰ دَ دینداری زندگی کنه، رنج-و-آزار ره مینگره. ^{۱۳} لیکن مردمای شریر و مکار از بد بدتر موشه. اونا دیگر ره بازی میدیه و خودون شی ام بازی موخوره. ^{۱۴} مگم تُو دمزو چیزای که یاد گرفتی و ایمان آوردی اُستوار بُمَن، چُون تُو میدنی که اونا ره از کی یاد گرفتی؛ ^{۱۵} و ازی که تُو از ریزگی قد کتابِ مُقدَّس آشنا بودی، اُو میتنه دَز تُو حکمت بدیه تاکه دَ وسیله ایمان دَ عیسیٰ مسیح نجات پیدا کنی. ^{۱۶} تمام نوشته های مُقدَّس از جانبِ خُدا اِلهام شُدِه و بلده تعلیم، سرزنش، اصلاح و تربیه دَ راه عدالت فایده مند آسته، ^{۱۷} تاکه بنده خُدا بلده هر کار

اهمیت کلام خدا

^۱ د حُضُورِ خُدا و مَسِيحِ عِيسَى که د بِلَه زنده ها و مُرده ها قضاوت مُونه، ما از خاطرِ ظُهُور و پادشاهی ازو تو ره اینی رقم قسم میدم: ^۲ از کلام وَعظ کُو و بَلدِه امزی کار وخت و ناوخت تیار بش؛ قد صبر-و-حَوصِلِه کلو و تعلیمِ دَقِیق، دِیگرو ره سرزَنش، ملامت و نَصِیحت کُو.

^۳ چُون زمانی مییه که مردم تعلیمِ دُرُست ره برداشت نُمونه، بَلکه د مُطابِقِ خاهِشای خودون خُو اونا بَلدِه خُو معلِمای غَدر گِرِفته جَم مُونه تا چیزای ره بِشَنوه که گوشای ازوا خاهِش شَنِیدون شی ره دَره. ^۴ پس اونا از شَنِیدون حَقِیقَت رُوی خُو ره دُور میدیه و د پُشتِ آوسانه‌ها گشته گمراه مُوشه. ^۵ مگم تو د تمامِ حالات هُوشیار و بیدار بُوده بَلدِه تَحْمَلِ رَنج تیار بش. د اِعلانِ کدون خوشخبری خود ره مَصرُوف کده وظيفه خُو ره پوره کُو.

^۶ چُون وختِ قُربانی شُدون مه رسیده و زمانِ رفتون مه ازی دُنیا نزدیک شده. ^۷ ما د مُسابقِه نیکو کوشش خُو ره کدم و دُوره خُو ره پوره کده ایمان خُو ره نگاه کدم. ^۸ و بعد ازی تاجِ عدالت د اِنْتِظار مه یه، امو تاج که مولا یعنی قاضی عادل د روزِ قیامت دَز مه

مُوبَخْشَه. و اُو رِه نَه تَنها دَز مِه مِيدِيه، بَلَكِه دَ پَگِ كَساي كِه شَوَق-و-اِنْتِظَارِ ظُهُورِ اَزو رِه
دَرِه.

نصِيحَتِ هَايِ شَخْصِي پُولَس

^۹ سَخْتِ كُوشِشِ كُو كِه هِر چي زُودَتَر دَ دِيرِ اَزْمِه بِيِي، ^{۱۰} چِرَاكِه دِيْماسِ مَرِه اِيْلِه كَد و اَز
خَاطِرِ دُوسْتِي و دِلْبَسْتَكِي دَ اِي دُنْيَا دَ شَارِ تَسَالُونِيكِي رِفْت. كَرِيْسَكِيْسِ دَ مَنطِقِه غَلَاتِيَه
و تِيْتَسِ دَ مَنطِقِه دَلْمَاطِيَه رِفْتَه. ^{۱۱} تَنها لُوقَا قَد اَزْمِه يَه. مَرَقَسِ رِه كِرِفْتَه قَد خُود خُو
بِيَرُو، چُون اُو بَلْدِه خِدْمَتِ دَز مِه فَايْدِه مَنْد اَسْتَه. ^{۱۲} تِيخِيكَاْسِ رِه دَ شَارِ اِفْسُسِ رِي كُدْم.
^{۱۳} دَ وَخْتِ اَمْدُو چَپَن مَرِه كِه دَ شَارِ تَرُو اَسِ پِيَشِ كَرِيْسِ اِيْشْتَم و اَمْچَنانِ كِتَابَا رِه و اَز پَگِ
كَدِه مُهْمَتَر نُسْخَه هَايِ پُوسْتِي رِه قَد خُو كِرِفْتَه بِيَرُو. ^{۱۴} سِيكَنْدَرِ مِسْگَرِ دَز مِه كَلُو ضَرَر
رَسَنْد. مَوْلَا دَ مُطَابِقِ اَعْمَالِ شِي دَزُو جَزَا بَدِيَه. ^{۱۵} تُو اَم اَزُو اِحْتِيَاطِ كُو، چِرَاكِه قَد پِيْغَامِ
اَزْمُو سَخْتِ مُخَالَفَتِ كَد. ^{۱۶} دَ اَوَّلِيْنِ مَحَاكِمِه مِه، هِيْچِ كَسِ قَد اَزْمِه يَارِي نَكَد، بَلَكِه تَمَامِ
شِي مَرِه اِيْلِه كَد. خُدا اِي رِه دَ حِسَابِ اَزْوَا نَكِيْرِه. ^{۱۷} مَكْمِ مَوْلَا يَارِ اَزْمِه بُوْد و دَز مِه
قُدْرَتِ دَدِ تَاكِه تَمَامِ پِيْغَامِ تَوْسُطِ اَزْمِه اِعْلَانِ شُنِه و پَگِ مِلَّتِ هَايِ غَيْرِ يَهُودِ اُو رِه بَشْتَوِه.
و ما اَز دَانِ شِيْرِ اَمِ خِلَاصِ شُدُوم. ^{۱۸} اَرِه، مَوْلَا مَرِه اَز هِر كَارِ شَيْطَانِي خِلَاصِ مُونِه و مَرِه
دَ سَلَامَتِي دَ مَلَكُوتِ اَسْمَانِي خُو مِيْرَسَنِه. بَزْرَكِي-و-جَلالِ تا اَبْدًا اَبَادِ اَزُو بَاد. اَمِيْن.

^{۱۹} دَ پَرِسَكِيْلَا و اَكِيْلَا و دَ خَانَوَادِه اُونِيْسِيْفُورُسِ سَلَامِ پَرَسَن. ^{۲۰} اِرَاَسْتُوسِ دَ شَارِ قَرْنَتُسِ مَنْد

و تروفيموس ره دَ شارِ ميليتس ايشتم، چراکه مريض بود. ^{۲۱} سخت کوشش کُو که پيش از
زمستو بيبي؛ اِفوئس، پودس، لينوس، کلاوديه و پگِ برارو تُو ره سلام مُوگه. ^{۲۲} مولا
عيسى قد روح تُو بشه. فيض و سلامتِي نصيبِ پگِ شمو شنه. آمين.

سوال داړيد؟ +1 807.700.6090

afghanbibles.org © آزرگي

Copyrighted material not for reprint/publishing purposes.